

ASOMA ta informa,.....(final)

Inhusticia ta sigui ser cometi contra nos musiconan

Pa; Elvy (Vi) Marten, Presidente

E ora 0 a pasa. Tempo ta bai transcuriendo y nos musico y otro artistanan kier sa na unda nan ta para. Di parti di ASOMA nos ta laga nos voz resona atrobe fuertemente contra tur e inhusticianan cu pa añanan caba ta worde cometi contra nos musico-artistanan. Ta mane- ra cos cu nos musico-artistanan no ta conta.

Nan ta bon solamente pa traha jingles y entrete- ne e fanaticadanan di partidonan politico durante campaña. Te ainda no ta comprendi- bel, cu musiconan ta laga otro nan prostitui nan, dijs pa un man yen di placa. Demuestra orguyo como artista. Atrobe si bo kier bai shelo, bo tin cu muri prome. Musico-artistam- nan boso lanta fo'i soño.

Atrobe, laga pasado pa pasado. Ban traha pa futuro. Nos mester bai enfoca riba huben- tud, cu ta nos artistanan di mañan. E nota di maneho 2005 di ASOMA ta papia pa su mes.

Musiconan cu a bai riba listanan politico, boso tin mi bendicion, pero atrobe no lubida cu boso lugar primeramente ta den fila di ASOMA, pa nos conhuntamente bringa pa nos derecho. Uni nos ta vence, dividi bo ta perece.

Nos sa cu Minister di Husticia, TA IGNO- RANDO NOS EXISTENCIA, demostrando un ABUSO DI PODER incompredibel. E mes tambe tog ta musico? Of ta interes per- sonal of ahenos ta prevalece?

Ta mas cu 6 luna caba cu ASOMA no ta ricibi ningun peticion pa nos sikiera por ta na altura kende a haya permis y ta cual gruponan musical ta bin toca na Aruba. Ta den medio- nan di prensa nos ta haya e informacion. Ora kier papia di respet, anto esaki mester ta algo mutuo. Y aki atrobe nos ta constata un falta di respet. Bisa hende nan berdad no ta falta di respet. Desprecia of ignora un persona como muestra di poder, arrogancia of represaile, si. Nos semper a demostra respet, pero tambe ta exige pa nos worde respeta. Esaki no ta nada personal, pero tin di haber cu e funcion cu nos ta eherce, y den e caso aki tin cu bai a base di reconocimiento mutuo. Dor di e actitud di Ministro di Husticia nos asociacion hasta ta worde perhudica financieramente. Den pais- nan Latino America tur gobierno ta respeta y subsidia nan asociacion di musico.

Pa di tanto biaha: Nos tin un Statuut aproba mediante "Ordenanza 6 di Mei 1976 no. 12, fecha 11 di Mei 1976, firma e tempo ei pa mr. G.R. HERMANS, Director di Centraal Bureau Juridische en Algemene Zaken. Tambe nos ta inscribi "Kamer van Koophandel en Nijver- heid Aruba desde 9 di December 1998, bao di no. 20481. Nos tin derecho di existencia.

Desde su existencia nos organisacion di musico, e tempo ei "ADAYMA" den e constel- acion Antiyano cu coöperacion di Ministro di Husticia y Salubridad, a fungi como consehero (advies-orgaan) di gobierno (Departamento di Orden Publico y Seguridad). A base di palabra- cion entre e Minister di Husticia y

di ASOMA, a yega na un acuerdo pa loc- concerni admision di artistanan di exterior cu te ainda di acuerdo cu e anuncio di Gabinete Oduner III, ta valido.

Unicamente un biaha pa luna por a permiti presentacion di un grupo musical di exterior, cu exepcion di e caso ariba menciona "turismo "Gezaghebbernan" di e tempo ei tabata zorg pa un bon maneho den e materia aki. Despues pa añanan ASOMA a fungi como consehero di gobierno, aunke manera nos a bisa cu hopi biaha nos tabata, y awor mas cu nunca ta worde ignora completamente, den decisionnan encuanto admision cu Ministro di Husticia ta tuma, violando reglanan existente, perhudi- cando asina nos musiconan.

Ta dicon nos nunca mas a tende di e "Con- cepto di Maneho" cu nos a entrega Ministro di Husticia den luna di Mei 2003, cu ta regarda admision di musiconan di exterior aki na Aruba. Dicon e adaptacion di "leinan di Dere- cho di Autor" no a tuma lugar.

Mi a comprende di Ministro di Cultura y Labor cu implementacion di e "Maneho Integral di Reorganizacion di Departamento di Cultura" ta na caminda. Nos a scribi tocante di asunto caba den nos comunicado anterior, y mi ta spera cu nos musiconan a tuma bon nota di dje. Solamente ta keda e pregunta atrobe: Dicon esun di nos a keda pega pa tanto tempo caba den un lachi somewhere?

E locual mi ta trece aki ta pa nos miem- bronan mes. Si Corsow (AMAK) por, Bonaire (ASOMBO) por, ta dicon nos no por? Por ta falta di interes, falta di madurez, falta di sensatez, falta di boluntad, falta di disciplina, bobedad, falta di ta kere den bo mes, falta di confianza? Ta kico ta e problema? Pakico miembronan no ta honesto cu nan mes? Pakico nan no ta acudi na directiva y vocifera nan pensamiento abiertamente, y no para afo grita. Un cos si ta cierto, ora bo ta cumpli cu bo deber bo por exige. Mi ta kere cu den esaki mi tabata hopi cla. Ta nos mes mester demostra orguyo y grandesa mediante nos actitud.

Laga nos "once and forever" demostra madurez, disciplina, corahe, honestidad. Mi kier termina atrobe cu e frase di costumber: UNION TA FORZA.